


ԳՈՒՌԸ

Արևիկ Հախնազարեան

Հոբիզն 2020



ԴՈՒՌ

Հեղինակ՝ Արմէն Հախումազարեան

«Հորիզոն»-ի բացառիկ յաւելում

**«ՀՈՐԻԶՈՆ» ՀՐԱՏԱՐԱԿԶՈՒԹԻՒՆ
ՄՈՆՈԲԷԱԼ
2020**

ԲՈՎԱՆԴԱԿՈՒԹԻՒՆ

| | |
|-------------------------|----|
| Դուռը..... | 4 |
| Որպես յաւելուած..... | 12 |
| Արմէն Հախնազարեան..... | 13 |
| Սամուէլ Կարապետեան..... | 14 |
| Այցելութիւն Դոան..... | 15 |

*Սոյն յաւելուածը նուիրուած է
Արմէն Հախնազարեանի ու Սամուէլ Կարապետեանի
յիշարակին*


Յաւելուածի հովանաւորներ՝
տիար Վարուժ Շիրիլեան և բժ. Հովիկ Շիրիլեան

Խմբագիր՝ Վրէժ-Արմէն Արթինեան
Պրատող և թարգմանիչ՝ Յարութիւն Շիրիլեան
Շարագրող՝ Սոնա Թիրթիզեան
Էջադրող և ձևադրող՝ Քրիստափոր Միքայէլեան

Les Publications arméniennes (1991)
3401 Olivar-Asselin
Montréal, Québec
H4J 1L5

ISBN 978-2-9806031-2-9

Dépôt légal - Bibliothèque et Archives nationales du Québec, 2020



ԴՈՒՌԸ

1975, Թեհրան: Տարեվերջը մօտենում է, մօտենում են սօնական օրերը եւ իրար վրայ դարսում հասած շնորհաւորականները, զարդարուած թանկարժէք տպագրութեամբ եւ ընդամենը ձեռագիր մի տող, մի ստորագրութիւն: Արդի աշխարհում յարաբերութիւնների մի ձեւ, տարին մի անգամ կրկնուող սովորութիւն՝ ասել ցանկանալով.– Քեզ դեռ չենք մոռացել...

Կան նաեւ բացառութիւններ էլ, օրինակ այս մէկը՝ Աթաթուրքի նամակադրոշմը ճակատին, Պոլսից:

Բացում եմ ծրարը: Բարակ թղթի վրայ մեքենագրուած երկու էջ եւ երկու փոքր սեւ-ձերմակ պատկերներ ծալուած թղթերի մէջ:

Նամակ ստորագրողը տիկին Բիխտերն է: Նա պատմում է իրենց հարեւանութեամբ ապրող հանգստեան կոչուած Բարձրաստիճան զինուորականի մասին, որը իր զաւակի հետ յաճախ որսի է գնում Մասնոյ անտառապատ լեռները: Այդ զինուորականը գնե՞րալ Իլի Սաիդը տեղին ծանօթ է իր ծառայութեան տարիներից եւ գիտէրում ունի իր կապերը:

Այդ տարի Թենքիթ (Տնգետ) գիւղի ռեսը լուր էր ուղարկել. «Մի հսկայ արջ է Մալաթօ դաղից (Մարութա սար) մեր կողմերում երեւացել, որը շարունակ փասսներ է հասցնում մեր գիւղին: Բէյ՝ սպասում ենք քեզ, ազատիր մեզ այս չարիքից»:

Հայր ու որդի մեկնում են, բայց ուշացած: Մշոյ շրջանում բռնում են ձմեռնամուտ բուր ու բորանի, խառնում ձիւն մէջ, ճամբան կորցնում ու մի կերպ իրենց հասցնում առաջին գիւղին՝ Հիրգիթին (Հերկերտ):

Օրեր ռեսի տանը փալուց յետոյ, երբ փոթորիկը դադարում է, իրենց մեքենան մարդ ու ջորու օգնութեամբ հրելով, քաշելով ձիւն միջից հանում հասցնում են մայրուղի եւ վերադառնում Պոլիս:

Նրանք ռեսի տանը չորս օր վայելում են թոնրի հացն ու քնաբեր տաք քուրսին, ակնատից հետեւում անընդհատ իջնող փաթիլներին, իսկ գիշերները մինչ լոյս քորում ոջիլի դէմ անյոյս պայքարում...

Երրորդ օրը, ռեսը մի քանի կցկտուր ակնարկներից յետոյ բացում է իր համարձակութեան կծիկն ու քաշքշուելով քաղաքից եկածներին վստահելով ուղեկցում է նրանց ախոռին կից մառանը, ուր դարմանի տակ «էսկի մալն» (հին առարկան) էր թաքցրել դուռը:

«Բէյ, ի՞նչ անենք, կափին (դուռը) մեծ է ու ծանր եւ Իստանբուլ տանելն ու ծախելը վտանգաւոր: Ժանդարմները ճամբին յաճախ քննում են եւ հնութիւն տեսնելուց նեղացնում: Եղբայրս Սվազի շուկայում է, միւս տղաս էլ՝ Ստանբուլում: Մտածում ենք՝ որ այս նախշերի համաձայն սղոցենք, մաս մաս անենք եւ դրսից եկած թուրիստներին ծախենք: Ի՞նչ էք խորհուրդ տալիս, վիճակներս վատ է, փողի շատ կարիքն ունենք»:

Հայր ու որդի իրար են նայում:

Երկփեղկանի, սեւին տուող դուռը իր բարձրաքանդակներով մարագի կիսամութի մէջ խորհրդաւորութիւն էր փոխանցում:

«Գիտէք՝ աղա,– վերջապէս ցածր ձայնով խօսում է զինուորականի զաւակը՝ Իստանբուլում մեր հարեւանը ալեման (գերմանացի) է եւ իր տանը հին-մին ապրանք ունի հաւաքած: Նախքան մասերի բաժանելը նկարենք, իրենց ցոյց տանք գուցէ նա հաւանի, գնի: Մպասէք, դեռ ձեռք մի տուէք, արժէքը կը պակսի»,– ասելացնում է հայրը:

«Արժէքը կը պակսի, լաւ, կը սպասենք ձեր լուրին բէյ»,– դուռը նորից ծածկում է դարմանով:

«Ուրեմն, պարոն Հախնագարեան, ուղարկում ենք ձեզ մեր հարեւանի նկարած պատկերները: Քրդերի դրան համար ցանկացած գումարը մօտաւորապէս հինգ հազար մարկ է անում: Ի՞նչ է ձեր կարծիքը, մեզ թւում է, որ արժէքը բարձր է»:

Երկփեղկանի դուռը անկասկած մի հայ եկեղեցու է պատկանել, եւ ինչքան փոքր ու անորակ են պատկերները, այնուամենայնիւ մէկի վրայ տեսանելի են փորագրուած տառեր, որոնք ընթեռնելի չեն:

Կարդում եմ նամակը՝ մէկընդմէջ խոշորացոյցով նկարների թեքուած: Անսպասելի տենդով բռնուած, նոյն օրն իսկ պատասխանում եմ երկտող գրութեամբ, որ դուռը հայկական է: Մի կերպ Մշոյ շրջանից փոխադրէք Պոլիս: Սպասում եմ ձեր լուրին:

Հարցերը շատ են: Արդեօք ո՞ր եկեղեցու եւ ո՞ր թուականի դուռ է: Պարզ է, որ գիւղի սովորական եկեղեցու դուռ չի:

Ապրիլին ստանում եմ պարոն Բիխտերի ուղարկած ծրարը՝ Մինանի շէնքերին նուիրուած հատորը: Թերթում եմ ծագումով հայ ճարտարապետի գիրքը եւ առաջին էջերի արանքում գտնում շատ բան չասող Զատկական տօները շնորհաւորող մի բացիկ: Բայց տողերի մէջ թաքնուած շատ բան ասող մի բան՝ Չենգիլի...

Կարդում եմ նորից ու նորից, ինձ համար անհաւատալի է, որ իսկապէս դուռը Չինգիլիին է, այնտեղից քանդուած, բերուած: Ուղղակի չեմ կարողանում հաւատալ:

Չինգիլի անունը իմ մէջ արթնացնում է անկրկնելի ապրումների, յուշերի ծով, որոնք կապուած են տարիներ շարունակ Արեւմտահայաստան կատարած ճամբորդութիւններիս հետ: Ճամբորդութիւններ մեր ճարտարապետութեան հետքերով՝ անվերականգնելի կորուստներից փշուրներ փրկագործելու: Թէկուզ մի պատկեր, թէկուզ մի մատուռի չափագրութիւն եւ նորից մտքով քայլում եմ ամցելի ճանապարհով, կանգնում ձորապոնկին՝ շունչ առնելու եւ ապրում եմ իմ մէջ յուսահատութեան անդունդը...

1976-ի մայիսին ստանում եմ Պոլսից Բիխտերի ստորագրութեամբ եւս մի բացիկ՝ ...Ձեր Եւրոպայի յաջորդ ճամբորդութիւնը Իստամբուլում ընդհատեցէք եւ մի քանի օր մեր հիւրը եղէք: Բոսֆորի գարունը աննման է: Շէշտը աննմանի վրայ է...

Քաղաքից մօտ կէս ժամ հեռու Եշիլքոյ օդակայանում ինձ դիմաւորեց պարոն Բիխտերը:

Հայոց պատմութեան մէջ տեղ գտած Սան Ստեֆանօ յունական գիւղը այսօր անուանափոխ եղած Եշիլգիւղն է: Մի անուն, որ անմիջականօրէն կապուած է Խրիմեան Հայրիկի շերտփին եւ հայկական հարցը որպէս աճուրդի դրուած ճշմարտութիւն՝ յօդուած 16-ին, որը Բերլինում վերածուեց 61-ի...

Երկուսս էլ գիտենք խնդրոյ առարկան եւ թէ գալուս պատճառը ինչ է, սակայն օդակայանի ճամբին, մեքենայում ոչ մի ակնարկ չի արւում, սպասում եմ որ ինքը խօսքը բացի:

Հասնում ենք Բոսֆորի ափին գտնուող իրենց եռայարկ տունը: Մուտքի բաժնում, հիւրասենեակում քօղարկուած անհամբերութեամբ աչքի եմ անցկացնում եղածը՝ ուր հնաքոյր իր շատ կայ, բայց ոչինչ անսովոր: Ինձ ուղեկցում են հիւրի սենեակը, ուր տեղաւորում եմ ճամպրուկս ու իջնում թէյի:

Նստած ենք պատշգամբում, բաժակները դատարկուել են նաեւ քաղաքավարական հարց ու պատասխանները:

Պարոն Բիխտերը տեղից դանդաղ բարձրանում է եւ խորհրդաւոր ցած ձայնով ասում՝ գնա՛նք:

Դուռը բացում է, ներս հրաւիրում: Փոքր ննջասենեակ, բարձր ճերմակ պատեր, փայտե յատակ, անկողինը ճերմակով ծածկուած, մի աթոռ, մի խաչ պատին յենուած ճերմակ սաւանով ծածկուած մի թեքութիւն: Դուռը փակում է, դանդաղ ու անձայն հաւաքում, ծալում է սաւանը: Սեւին տուող փայտե երկփեղկանի դուռը, շօշափելի մօտիկութեամբ իմ առջեւումս է: Ինձ համար մի հրաշք: Կոտորածից ազատուած մի բուռ մշակոյթ...

Դրան փեղկերը չորս կողմից շրջանցում է երկրաչափական զարդագօտին, որին յաջորդում է աւելի լայն բուսականը: Նոյն զարդագօտիներով դռների մակերեսը չորս մասերի

են բաժանում, ներքեւիները եւ վերի երկուսը քառակուսի են, իսկ երկրորդը միւսներից աւելի նեղ ու քառանկիւնի: Յիշուած ութը բաժանումները շրջանցում են ոլորապտոյտ երիզով:

Երկու դռների երեքական քառակուսիներում քանդակուած են բարդ ու գեղեցիկ նախշուններ: Աջինը ունի երկրաչափական իսկ ձախինը բուսական զարդաձեւեր:

Փեղկերի կենտրոնում գտնուող քառակուսիները շեշտուած են կլոր ծաղկազարդ հիւսուածքով՝ անկիւններին երկու հրեշտակ, թռչուն ու կենդանիներ: Այս բոլորը յիշեցնում է խաչքարերի ներքեւում եղած կորիզն ու կեանքը խորհրդանշող յաւերժականութիւնը:

Դրան զարդը սակայն, երկու քառանկիւններում քանդակուած Առաքեալներն ու Աւետարանիչներն են կանգնած վիճակով: Չախում եօթը Սրբեր, որոնցից հինգը իրար նման են, իսկ երկուսը աւելի փոքր, որոնցից մէկը Յիսուսի մկրտութիւնն է ներկայացնում Սուրբ Հոգու նշանը վրան: Աջում չորս Առաքեալներն են փոքրիկ սիւներով իրարից բաժանուած՝ Պետրոսը բանալին ձեռքին, Պօղոսը սուրով:

Պատմութիւն բուրող գեղեցիկ քանդակներին աւելանում է հայկականութեան կնիքը՝ արձանագրութիւնը որ գտնուում է փեղկերի ճակատին եւ ներքեւում, մեծ մասամբ լաւ ընթեռնելի:

Դրան կողպէքի մասը լրիւ ջարդուած է, եւ գնդակներով ծածկուած: Դռների վերի մասում եւ ներքեւում կան մեխերի առաջացրած կոպիտ փասաներ:

Արձանագրութիւններն են.

Աջ կողմի դրան ճակատին՝
ՇԻՆԵՑԱԻ ԴՈՒՌՄ ՍԲԿԱՐՊ..ԻՍ ԶԵՌԱՄԲ ՊԱՐՈՆՍ ՄԱՐԿՈՍԻ

Աջ կողմի դրան ներքեւում՝
ԻԹՎ. Հ. : ԶԿԱ (1512) ՇԱՄԱԿԻՐԵԻ... ԾՆՈՂԱՑ ԻՒՐՈՑ

Չախ կողմի դրան ճակատին՝
ԵՒ ՈՐԴՈՒՆՈՐԱ ՊԱՐ(Ն)ՈՆ ՄԻՐԱՊԵՏ ԱԻ ԱՄՁԱՏԻՑ

Չախ կողմի դրան ներքեւում՝
ԵՍ ՍԱՐԵՊԻՆՈՐԿԱԶՄԵՑԻ.....

Արձանագրում եմ արագ, ոտքի կանգնում, թուղթը գրպանս դնում: Դուռը նորից ծածկուում է ճերմակ սաւանով: Իջնում ենք: Ընթրիքը պատրաստ է: Մատուցարարուհին գալիս գնում է, ուտում ենք, կարծեմ համեղ բաներ, բայց միտքս ուրիշ տեղ է, խօսակցութեան միակ նիւթը դուռն է:

«Ուրեմն ձեզ պատմեմ»: Անձեռոցիկը թեթեւ բերնին տանելուց յետոյ սկսում է պարոն Բիխտերը.– «Չէք կարող պատկերացնել, ի նչ դժուարութիւններով դուռը, տնային ապրանքների տակ ծածկուած, գիւղից հասաւ քաղաք, եւ գիշերով, ոչ թէ մուտքից այլ պարտեզի կողմից, ուր պատը նորոգուում էր, մի կերպ ներս բերեցին: Գիտէք՝ մեր միւս հարեւանը Հիւրիյէթ թերթի խմբագիրն է, պիտի շատ զգոյշ լինենք, հասկանալի է, չէ՞ »:

«Լաւ, մինչ այստեղ յաջողեցինք, սակայն մեր տանը պահելն էլ հարց է, կարող է մեզ համար էլ վտանգաւոր դառնալ: Մա հնութիւն է եւ որպէս այդպիսին համարուում է ազգային հարստութիւն, եւ երկրից դուրս տանելն էլ արգելուած է»:

Երբ վճարուած գումարը փոխանցելու մասին ակնարկեցի, մի փոքր լռութիւնից յետոյ

տիկին Բիխտերը ասեց «Գիտե՛ք՝ մենք վճարել ենք սիրով, թողնենք այսպես ժայ, քանի որ առայժմ մեզ մօտ է, եւ մենք ենք իր գեղեցկութիւնը վայելում, իսկ եթէ ձեր օգնութեամբ հնարաւոր եղաւ երկրից դուրս տանել, այն ժամանակ առաջնահերթութիւնը ձերն է, մի բան կը մտածենք...»:

Ուշ էր, երբ սենեակս բարձրացայ, պառկեցի, բայց քունս չէր տանում: Դուրս եկայ պատշգամբ, նստեցի: Լուսնի լոյսով մի քանի ձկնորսական նաւակների ստուերներն էին երեւում հեռուում, միջոցը խաղաղ էր, հազիւ լսելի էր թեթեւ ալիքների հանդարտութիւն փոխանցող ձայնը: Իմ մէջ փոթորիկ էր: Օրուայ դէպքերն ու անցեալի ապրումները իրար հրելով հրմշտկելով նոր հարցեր էին առաջացնում, ինձ տակնուվրայ անում:

Այսօր Թուրքիայում Չենգիլի (քրդերէն զանգակաւոր) կոչուող վայրը, նշանաւոր Սուրբ Կարապետի վանքն է...

Սուրբ Կարապետի վանքը գտնուում է Մուշ քաղաքի հիւսիս արեւելքում՝ մօտ 35 քմ հեռու:

Յիշում եմ, արեւածագից առաջ Մուշից դուրս եկանք դէպի հիւսիս՝ Գառնէն (Քարնի) գիւղից, յետոյ կտրեցինք Մեղրագետը (Քարասու), անցանք միւս կողմում Խոպերը (Հոփեր) գիւղը, որտեղից թեքուեցինք արեւմուտք եւ անցանք Գոմս (Քիւմուս), Փալաս (Փալաս), Տոմ (Դոմ), Զիարեթ (Յիարեթ) դարեր հայաբնակ այսօր քրդաբնակ գիւղերից: Հողէ ճամբան՝ երկու օր առաջ տեղատարափ անձրեւների պատճառով յաճախ անանցանելի էր: Միալմամբ հասանք Դերսիւմ եւ այնտեղից ուշացած վերջապէս Սորդար (Սորդաք): Մեքենան ապսպրանքներով թողեցինք մէյրանի թէյատան մօտ, թէյ խմեցինք ու երբ ուզում էինք Սուրբ Կարապետի վանքը՝ Քարքէ լեռը բարձրանալ, մեր քուրդ վալաղը փորձում էր մեզ համոզել, որ չգնանք, թէ «Չանգիլիում ապրողները վայրենի քրդեր են, մեզ պէս ինչ են...»:

Առուակն ու իրար փաթաթուող սարափէշի բարակ ճամբով բարձրանում ենք, մի կողմում լերկ ժայռեր, միւսում ձորեր, ձորակներ՝ շագանակի եւ ընկուզենու ծառերով:

Ժամեր բարձրանում ենք մումերի հետքերով, նուիրականացած քարեր ամէն կողմում: Վերին սարահարթի բարձունքում Մուշեղ Մամիկոնեանի ակերակուած բերդն է, միւս կողմում նրա դիմացի ժայռը «Աղջկանց քարն» է: Ինչքան բարձրանում ենք, այնքան ակելի յաճախ ենք անցնում սօսիների պուրակներից: Սօսին հեթանոս Հայաստանի խորհրդանիշն էր: Հայերը ռազմի դաշտ էին իջնում սօսին պատկերող դրօշակներով: Գողթանի Սօսին 2600 տարեկան է, որի շուքի տակ Մեսրոպ Մաշտոցը հայերէն տառերի գիւտն արարեց:

Ընդհանրապէս հայկական վանքերը թաքնուած են սարերի յետեւում, ձորերի մէջ: Սուրբ Կարապետ լեռան գագաթին է չորս կողմից տեսանելի, եւ բարձր, այնքան բարձր որ կարելի է Աստծուն մօտ լինել...

Գլակավանք:

Իննականեան վանք:

Մշոյ Սուլթան Սուրբ Կարապետ:

Այս անուններով է ճանաչուած հայ հաւատքի հնագոյն սրբատեղիներից մէկը՝ իր նշանակութեամբ երկրորդը Էջմիածնից յետոյ:

Ինչպէս քրիստոնէայ հնագոյն եկեղեցիներից շատերը, սա եւս հեթանոսական կործանուած տաճարի վրայ է կառուցուել: Գիսանէ եւ Դիմիտր կուռքերի մեհեանն է եղել այստեղ, որը կործանել է Գրիգոր Լուսաւորիչը՝ հիմնելով այս վանքը, այստեղ զետեղելով Սուրբ Կարապետի եւ Աթանգինէ եպիսկոպոսների նշխարները:

Առաջին վանահայրը Զենոբ Գլակն է եղել: Գրիգոր Լուսաւորչի աջակիցը, որի անունով էլ կոչուել է Գլակավանք:

Վանքը ունէր բազմաթիւ մշտահոս աղբիւրներ, որոնցից նշանաւորը ոչ շատ հեռու դէպի հիւսիս Աւագ ակն էր, ապա Լուսաւորչի աղբիւրը, Բարեհամը եւ Ականակիտը՝ ինը

կողք-կողքի բխող աղբիւրներ, որոնց պատճառով էլ վանքը կոչուել է նաեւ Իննակնեան վանք:

Պատմութեան ընթացքին վանքը շատ անգամներ ւաւերուել է եւ նորից վերակառուցուել:

7-րդ դարում վանքը երկրաշարժից հիմնովին ւաւերուել է, որից յետոյ կառուցուել է նրա գլխաւոր եկեղեցին՝ Սուրբ Ստեփանոսը: 11-րդ դարում Գրիգոր Մագիստրոս Պահլաւունին վանքում կառուցել է տուել ապարանք մը, որը սակայն այրուել է 1058 թուին Սուրբ Գրիգոր փայտակերտ եկեղեցու հետ:

1750 թուին թուրք-պարսկական պատերազմների ժամանակ վանքը թալանուել է եւ եկեղեցին այրուել է:

Յովսէփ Էմինի ազատագրական պայքարի ընթացքին՝ 18-րդ դարու կեսին, վանքը Յովսէփ Էմինի հովանաւորութեամբ հանդիսացել է կարեւոր քաղաքական կենտրոն: 1784-ի երկրաշարժը նորից ւաւերում է եկեղեցին: Վանքի տարբեր մասերը հիմնովին վերակառուցում են 1788 թուին, ընդարձակելով գաւիթը, նորոգելով զանգակատունը, վանականների խուցերը, գրչատունը, պարիսպները, եւ այլն:

Վանքի համալիրը բաղկացած էր մենաստանից եւ եկեղեցուց, որոնք շրջապատուած էին բարձր պարիսպով: Միաբանների երկյարկ բնակարանները պատով անջատուած էին ուխտաւորների սենեակներից: Վանքի մաս էին կազմում գրապահոցը, սեղանատունը, տնտեսական բաժինը եւ այլն:

Եկեղեցին քառակուսի յատակագծով մի ամբողջութիւն էր: Ունէր 16 սիւնանի դաս, արեւմուտքից 1782-ին կառուցած նախամուտք զանգակատուն, իսկ արեւելեան հատուածը բաղկացած էր իրար յաջորդող չորս եկեղեցի-վկայարաններից՝ կենտրոնում երկու գմբէթածածկ եկեղեցիներ, իսկ միւս երկուսը միանաւ բազիլիկներ:

Եկեղեցու արեւմուտքում մարմարէ ութը սիւնների վրայ զանգակատունն էր, որը դարեր շարունակ իր դոզանջի օրհնութիւնն էր փռել Արածանի սրբազան գետով ակօսուող Մշոյ լայնարձակ դաշտի վրայ:

Սուլթան Սուրբ Կարապետը հայութեան ամենասիրուած ուխտատեղիներից է եղել, Վարդավառի եւ Աստուածածնի տօներին երկրի ամենահեռաւոր ծայրերից իսկ ուխտաւորների քարաւաններ են եկել դէպի այս սրբավայրը եւ ժողովրդական մեծ հանդիսութիւններ են կայացել վանքի բակում եւ վանքի շուրջը. ձիավարժութիւն, խաղեր, երգեր ու տաղ, գուսանների մրցութիւն: Բուժիչ զօրութեան համբաւով ծանր հիւանդներ եկել են վանք եւ առողջացած վերադարձել... Հապա «ճաշը»: Վանքի ճերմակ եգներից մէկը մատաղ էին անում, մեծ դազաններում ճաշ պատրաստում եւ ռամիկից իշխան մի պնակ ուտում եւ այդ օրը Աստծու տանը մէկ էին լինում: Հաւասարութիւն խորհրդանշող հրաշալի մի երեւոյթ:

Այս տողերը գրելուց, յիշում եմ Սուրբ Թադէոս Առաքեալի վանքի ուխտագնացութեան ներկայ օրերի այն գոեհիկ տեսարանը, երբ մատաղի հասկացողութիւնը սահմանափակում էր մորթելու մէջ...

Սուրբ Կարապետի վանքը եղել է դարեր շարունակ գիտութեան եւ գրչութեան կենտրոն, եղել է հայութեան հոգեւոր ուժի ակունքներից եւ դա զգալով է որ յաճախ թշնամիների կողմից թիրախ է հանդիսացել:

1822 թուին դարձեալ վանքը ենթարկուեց յարձակման, կողոպտուեց եւ ոչնչացուեցին մեծարժէք շատ ձեռագրեր:

1863 թուականին հոգեւոր հովիւ նշանակուեց Խրիմեան Հայրիկը: Նա Վարազայ վանքից Սուրբ Կարապետի վանք տեղափոխեց տպարանը եւ այստեղ իր աշակերտ Գարեգին Արք. Սրուանձտեանի հետ սկսեց հրատարակել «Արծուիկ Տարօնոյ» ամսագիրը:

Առաջին համաշխարհային պատերազմից առաջ, այս վանքը Արեւմտեան Հայաստա-

նի հոգեւոր եւ ազգային խոշոր օջախներից էր: Այստեղ գործում էր «Ժառանգաւորաց» գիշերօթիկ դպրոցը, որը 80 աշակերտ ուներ: Արեւմտահայաստանի շատ բնակավայրերի դպրոցների հիմնադիրները այս դպրոցի շրջանաւարտներն են եղել:

1915 թուականի Մեծ Եղեռնի օրերին հալածուած հայերի մի մեծ բազմութիւն էր ապաստանում վանքում եւ նրա շրջակայ անտառներում: Թրքական կանոնաւոր զօրքն ու քուրդ հրոսակախմբերը յարձակում եւ շրջապատում են վանքը, սակայն դիմադրութեան են հանդիպում, որը տեսում է շուրջ երկու ամիս: Այդ ժամանակամիջոցում վերջին վանահայր Վարդան վարդապետը իր երկու գործակիցների հետ հասցնում են վանքի ձեռագրերն ու արժէքաւոր իրերը երեք թաքստոցներում թաքցնել: Թրքական զօրքը թնդանօթներ է բերում, վանքը ոմբակոծում, մի քանի տեղից պարիսպը ւաւերում ու թալանի տենչով ներս մտնում: Ահաւոր էր կոտորածը, եւ պաշարուածների շատ փոքր մասն է կարողանում փախչել, որոնցից միայն մի քանիսն են հասնում Արեւելեան Հայաստան: Նրանց մէջ էր վանքի ուսուցիչ Յակոբ Դանիէլեանը, միակ կենդանի վկան որը գիտէր թաքցրած ձեռագրերի տեղը: Մի մարդ որ իր կնոջ ու երկու զուակների փրկութեան գնով իսկ ձեռագրերի տեղը չմատնեց:

1916 թուականին, երբ ռուսական բանակի յառաջապահ՝ հայ կամաւորականները գրաւում են Մուշը, Կարթոլիկոսի նշանակած յատուկ յանձնախմբով Յակոբ Դանիէլեանը գալիս է Մուշ՝ Սուրբ Կարապետ վանքի թաքցրած հարստութիւնները տեղափոխելու նպատակով: Թուրքերը քանդել էին իրենց ենթադրած տեղերը, պայթեցրել էին վանքի երեք գմբէթները եւ գտել ու թալանել երկու գաղտնարաններ: Բարեբախտաբար ձեռագրերի եւ իրերի առաւել արժէքաւոր մասը երրորդ գաղտնարանում էր, որը չէին գտել (Գրական թերթ, 1-1-1990): 1750 արժէքաւոր ձեռագրեր՝ ինչպէս Հեթում թագաւորի Աւետարանը, Քրիստոսի ոսկեձոյլ Աջը, նաեւ վանքի գանձարանը տեղափոխում են Էջմիածին, փրկում:

Սօս երեք ժամ քայլում ենք, թում է, որ շուտով պիտի տեղ հասնենք: Տարբեր կողմերից զլլացող առուակներ են վազում: Չգիտեմ, որը որն է: Ենթադրում եմ՝ ահա այս մէկը, որ սարալանջի արեւմտեան կողմով է հոսում, Լուսաւորչի աղբիւրից է, որի ջուրը երկու կամարների տակից գալիս լցում էր Տրդատ թագաւորի քարէ աւազանի մէջ, ուր Գրիգոր Լուսաւորիչը շատերին էր կնքել:

Ճամբի աջ կողմում մի ուրիշ աղբիւր կայ: Չոքել ենք, խմում: Երեւի սա էլ Բարեհամր ակն է, իսկապէս համեղ ջուր, որից կշտացողը հիւանդ է...

Անցնում ենք անթիւ փորում, քար ու քանդ եղած գերեզմանների մօտից, ո՞վ գիտէ, (մի գուցէ) Սմբատ սպարապետի եւ իր զուակ Գայլ Վահան Մամիկոնեանի ջարդուած տապանաքարերն են:

Հասնում ենք լեռան գագաթին նստած Սուրբ Կարապետի վանքին՝ այսօր հսկայական մի աւերակոյտ:

Քարը քար է, բայց երբ տաշում են յղկում, քանդակում, սկսում է խօսել, պատմել նոյնիսկ երգել կամ բողոքել, բայց երբ քանդում են լաց է լինում...

Ապշած կանգնել ենք աւերուած յուշարձանի շեմին՝ մղկտացող ցաւը մեր մէջ, անելիքներս չգիտենք, ո՞րը նկարենք, ի՞նչը չափենք, երբ պարսատիկներից թռած մի քանի քարեր սուրալով անցնում են, մեզ սթափեցնելով եւ յիշեցնելով թէ ուր ենք մենք... Մեզ շարունակ հետեւում են աւերակներից դուրս նայող կասկածամիտ խոժոռ աչքեր՝ թէ ի՞նչ ենք նկարում, ո՞ւր ենք գնում, ի՞նչ ենք փնտռում: Ամենուրեք կոտորած քանդակազարդ քարեր, դէս ու դէն արձանագրութիւններ, հաստաբուն որմնասիւնների մնացորդներ: Դիմացի աւերակոյտում ինչ որ մի անցք: Դժուարութեամբ ներս եմ մտնում մուշ խոռոչը, հաւանաբար մի մատուռ լոյսի գերանը միջում: Գանձախուզութեան հետքերը ամէն տեղ, բացուած փոսեր եւ ով զարմանք՝ հեթանոսական ակունքով պատեր՝ մեհենատեղի եղած լինելու անդառնալի փաստը... Մի ուրիշ տեղ կաւէ ոլորպտոյտ խողովակներ: Արդեօք տաք ջրի կամ գոլորշի փոխանցող

ներքին ջեռուցման բացառիկ մի նմոյշ: Վանքը ծովի մակերեսից շուրջ 2200 մետր բարձր լինելով ձմրան ցրտաշունչ ամիսների և պաշտպանություն միջոցների կարիքը ունէր:

Թոնրի, թարմ հացի հոտն էմ զգում: Քուրդ մամիկը տրտունջը դէմքին ժպտում է, տաք լաւաշ մեկնում: Վերցնում էմ շնորհակալութեամբ եւ զգում էմ, որ շատ քաղցած էմ: Դրամ էմ մեկնում: Ինչ որ բան է ասում, չի վերցնում: Ծաղկահամ լաւաշը ուտում էմ եւ նկարելը շարունակում:

Աստիճանաբար քարերի շուաքը երկարում է, իրիկունը մօտենում, իսկ հեռում, ներքեւում մշուշաձաձկ Մշոյ դաշտում ոլորապտոյտ Արածանին է արծաթին տալիս:

Պատրաստում ենք իջնել: Նորից խմում ենք Բարեհամ աղբիւրի ջուրը: Մթնոլորտը խաղաղ է, ձայն չկայ, կայ մեռեալ ամայութիւն, կայ գերեզմանուած հսկայ մի վանք, որի դամբանականը լռութիւնն է: Միայն լռութեամբ է կարելի այս անհամար փոսերը լցնել...

Նոյն ճամբով իջնում ենք. Դեռ լոյս է, բայց տժգոյն լուսինն էլ արդէն երկնքում է: Լուռ ենք: Մտածում էմ որ երջանիկ չի կարող լինել այն հողը որը իր մէջ այսքան գոհերի անարդարութիւնների գերեզմանուած պատմութիւն է թաքցնում, եւ մտածում էմ որ գուցէ դեռ երկար ժ ամանակ այս հարցը մերն է, իսկ հողը չճնուածներին...

Արշալոյսի առաջին գունատ լոյսը սթափեցնում է ինձ: Բարձրանում էմ տեղիցս: Պիտի ճամպրուկս հաւաքեմ, հասնեմ օդակայան: Խաղաղուել էմ եւ յոյսի բարակ մի շող էմ հեռում տեսնում...

Երկու շաբաթ յետոյ Թեհրանում դրան մասին տեսածս ու լսածս պատմում էմ հօրս եւ խնդրում իրեն որ միջնորդի, դուկտ. Յինգերին նամակ գրի թէ ես մի հարցում իր խորհրդի կարիքն ունեմ:

Դուկտ. Յինգերը գերմանական դեսպանատան մշակութային կցորդն էր, որը տարիներ շարունակ հինգշաբթի երեկոյեան հօրս մօտ գրաբար դասի էր զալիս, որից յետոյ էլ յաճախ մտում էր ընթրիքի: Նա մի քանի տարի էր, որ պաշտօնի բարձրացումով փոխադրուել էր Թուրքիա, Անգարա:

Զգում էի, որ հայրս տատանում է, դժուարանում է գրել: Վերջապէս գրեց, որի պատասխանն էլ շատ արագ եկաւ: Դուկտ. Յինգերը ինձ հրաւիրում էր Անգարա, եւ խոստանում օգտակար լինել: Անշուշտ դեռ խնդրանքս չգիտէր...

Նոյն տարի սեպտեմբերին, հայկական բերդերի հետքերով գիտարշաւ էի ծրագրել դէպի Կիլիկիա, որը պատեհ առիթ էր նաեւ Անգարայից անցնել:

Նշանակուած օրը, դուկտ. Յինգերը օդակայանում էր, եւ քիչ յետոյ միասին էինք մեծ պարտեզով շրջապատուած իր փառահեղ տանը:

Մանրամասն կերպով իրեն պատմեցի Մուրբ Կարապետի վանքի եկեղեցիներից մէկի դրան պատմութիւնը: Լսեց առանց ընդմիջումի եւ, երբ խօսքիս վերջում զուշօրէն մօտենում էի բուն առաջարկիս, կռահեց, ընդհատեց ինձ եւ կտրականապէս մերժեց ասելով.– «անհնարին է, դա մաքսանենգութիւն է»...

Յոյսի փոքր ակնատն էլ փակուեց: Տխուր էի շատ, բայց ոչինչ անել չէի կարող:

Յաջորդ օրը, ըստ նախօրօք ծրագրուածին, հանդիպեցի Գերմանիայից եկած երկու ճարտարապետների, եւ միասին մեկնեցինք Ատանա:

Ամիսներ յետոյ, այս անգամ Վիեննայից ուղարկուած երկար նամակով պրն. Բիխտերը ուրախութեամբ տեղեկացնում էր, որ դուկտ. Յինգերը Պոլիս կատարած մի ճամբորդութեան ժամանակ, հեռախօսել է իրեն եւ ցանկութիւն յայտնել դուռը տեսնել:

Նա գրում է, թէ ինչպէս դուկտ. Յինգերը երկար նայել է դրանը եւ առանց իսկ մի հարց տալու ասել.– «լաւ, մի ելք կը գտնենք...»

Ուրախացած անմիջապէս պատասխանում էմ այս նամակին, մտածելով որ յոյսի նշոյլ կայ, եւ գուցէ նոյնիսկ առեւանգուած դուռը տունդարձի ճամբին է...

Նամակս Ժամանակում է անպատասխան, մտահոգ եմ: Մի քանի ամիս յետոյ ուղարկում եմ եւս մի նամակ: Մա էլ է անպատասխան Ժամանակ:

Այս լռութիւնը անսովոր է: Կանխագգում եմ ինչ որ վատ բան:

Աւելի քան մի տարի յետոյ, բոլորովին անսպասելի ստանում են լակոնական ոճով մի գրութիւն: Տիկին Բիխտերը յայտնում է, որ իր ամուսինը վախճանուել է, եւ ինքը փոխադրուել է Գերմանիա՝ Միւնխեն քաղաքին մօտ գտնուող արուարձանը եւ վերջում մի կարճ նախադասութեամբ յայտնում է, որ դուռը գտնուում է Գերմանիայում...

Մեկնում եմ Միւնխեն, եւ ըստ ժամադրութեան հանդիպում եմ տիկին Բիխտերին, իր փոքր, սեղմուած բնակարանում:

Իրեն շատ փոխուած, ընկճուած եմ տեսնում: Պատմում է ընդհատուժներով, աչքերը սրբելով:

«Պարոն Տինգերը մեզ իրապէս շատ օգնեց: Ամուսինս դուռը դժուարութեամբ հասցրեց Անգարա, որտեղից նա որպէս դեսպանատան բարձրաստիճան պաշտօնեայ, իր անձնական ապրանքների հաշուին փոխադրել տուեց Գերմանիա եւ այժմ Ֆրանկֆուրտ քաղաքում, մի պահեստանոցում է»:

Տիկին Բիխտերը շարունակում է պատմել:

«Յիշում էք չէ՞, Պոլսում, մեր տանը աշխատող մատուցարարուհին: Վաղուց էր որ նկատել էինք, մեր տնից ինչ որ բաներ սկսել են պակսել: Երկար տեւեց բայց կարողացանք ստոյգ հաստատել որ նրա ձեռքը մաքուր չէր եւ իրեն վտարեցինք:

«Անցնում է մի քանի օր, երբ բոլորովին անսպասելի չորս ոստիկաններ են մեր տուն գալիս եւ առանց շատ բան ասելու մեզ ձերբակալում, տանում են բանտ, իսկ մեր ունեցածն էլ գրաւուած յայտարարում՝ մեզ զրպարտելով որ մենք հին եւ արգելուած իրերի առետուրով ենք զբաղուել: Պարզում, որ թրքուհու խօսքը աւելի կշիռ ունի քան քառասուն տարուայ մեր անցեալը այս երկրում, ուր ամուսինս ճանաչուած էր որպէս օրինակելի անձնաւորութիւն: Անշուշտ սիրում էինք եւ հաւաքում որոշ հնութիւններ՝ յատկապէս բիզանդական սրբապատկերներ, որոնցից մեր հիւրասենեակի պատերին շատ կար, բայց ոչ վաճառականական նպատակով:

«Բարեբախտաբար, դուռը այդ դէպքից օրեր առաջ տնից դուրս էր բերուել եւ ճամբին էր դէպի Եւրոպա»:

Տիկին Բիխտերը շարունակում է.

«Ամուսինս բանտում սրտի իրար յաջորդող երկու տագնապներ է ունենում եւ վախճանում է հիւանդանոցի ճամբին: Ինձ արձակում են բանտից, սակայն պարտադրում են միայն երկու պայուսակով թողնել երկիրը»:

Պատմում է, աչքերը սրբում եւ աւելացնում.

«Ստիպուած եմ դուռը վաճառել, միայն չգիտեմ ինչ արժէքով»:

Այդ հանդիպումը ինձ համար յոյսի եւ մտահոգութեան նոր դուռ է բացում...

Այդ օրուանից տարիներ անցան, բայց ես միշտ տարբեր առիթներով փնտռեցի գտնել մէկին, որ դուռը գնի եւ փոխադրի այնտեղ, ուր իր միակ արդար տունն է՝ Հայաստան:

Ինձ մտերիմ եւ բարեկամ մի անձնաւորութիւն՝ ժամանակին հետաքրքրուեց, սակայն իր խորհրդատուի սխալ միջնորդութիւնը խանգարեց, ուղիղ ճամբան շեղեց եւ տարիների հետեւողականութեամբ տարուած գործը Ժամանակում ապարդիւն ձախողեց:

Անցեալ տարի՝ 1996-ի աշնանը Լոնդոնում աճուրդի դրուեց մի բուռ հայոց պատմութիւն եւ մուրճի հարուածով Մշոյ Սուլթան Սուրբ Կարապետի դուռը վաճառուեց անձանօթ օտարի:

Հեռախօսով լսում եմ Մեսրոպ Արքեպիսկոպոս Աշճեանի յուսախաբ ձայնը. «Շատ նեղուած եմ, Արմէն, մերոնց զգուշացուցի, մերոնք հոն էին եւ ոչինչ չըրին: Դուռը ոչ հայ մէկը գնեց, չգիտենք ով...»:

Դժուար է հոգու աչքերը փակել եւ չտեսնել, չլսել եւ չիշել, երբ յիշողութիւնը ամէն ազգի այն հոգեւոր թելն է, որով կարուում է նրա բարոյական զգեստը:

Դուռը, որը բացում էր դէպի մեր հոգեւոր մշակութային ակունքները, մեզ համար մնաց փակ, եւ աճուրդի ճամբով գնաց օտարութիւն, իր հետ տանելով Սշոյ Սուլթան Սուրբ Կարապետին կապուած մեր պատկանելիութիւնը:

Գրել, աւարտել եմ դրան իմ պատմութիւնը: Նայում եմ պատուհանից դուրս, անձրեւից յետոյ պայծառ արեւ է, պարզ կապոյտ երկինք, բայց ես ամաչում եմ նայել երկնքին...

**Արմէն Հախնազարեան
Ասխրն, Գերմանիա**

Արմէն Հախնազարեան ճարտարապետ է, ամբողջ կեանքը նուիրած մեր ճարտարապետական յուշարձաններու, յարկապէս Արեւմտեան Հայաստանի ու Կիլիկիոյ և հիմա՛ նաև՝ Քելբաջարի փարածքին անտէր մնացած, թալանուող, քանդուող յուշարձաններու փրկութեան՝ լուսանկարման, չափագրման և գեթ մոռացումէ փրկումի գործին:

ՈՐՊԷՍ ՅԱԻԵԼՈՒԱԾ

Բայց ես ամաչում եմ նայել երկնքին...

Իր պարտութեան դիմաց, Արմէն Հախնազարեանը մղկտացող սրտով է, որ կը խոստովանի թէ... «Ես ամաչում եմ նայել երկնքին»... Ով որ կը ճանչնայ Արմէն Հախնազարեանը, կը հասկնայ, թէ ինչո՞ւ այս հայ մեծ ճարտարապետը եւ եկեղեցիներու ճարտարապետութեան ախոյեանը, ամբողջ արեւմտեան Հայաստանը, Կիլիկիան, Քելբաջարը մատնեալն պէս ճանչցող ուղեւորը, արուեստագէտ լուսանկարիչը, Գերմանիոյ համալսարաններու մէջ փնտռուած քաղաքաշինութեան վարպետը, չի կրնար աչքերը երկինք բարձրացնել. կամչնայ, կամչնայ իբրեւ հայ, կամչնայ իբրեւ արուեստի մարդ, կամչնայ, պարզապէս իբրեւ մարդ:

Գրեթէ իր աչքերուն առջեւ, անցնող հոկտեմբեր 15-ին, Լոնտոնի Քրիսթիզ ընկերութեան սրահին մէջ, auctioner-ի մուրճին մէկ հարուածով դարձեալ գետին ինկաւ Սշոյ Սուլթան Սուրբ Կարապետի տաճարին մայր դուռը, որ 70 տարի ինքզինք պահեց Սշոյ մէջ, գաղտնաբար ապրեցաւ Պոլիս, Ֆրանկֆուրտ, օրին մէկը ստրուկի պէս ծախուելու համար Անգլիոյ մէջ:

Կողբանք Եագութիէի եկեղեցւոյ մզկիթացումը, իրարու վրայ մեղադրանքներ կը բանաձեւենք, յանցաւորներ կը փնտռուին Փարիզէն Լոս Անճելըս: Ով պիտի ողբայ մեզ՝ որ տէր չդարձանք մեր ամենէն նշանաւոր ուխտավայրին՝ Չանկլիի Ս. Կարապետի դրան, որ 50,000 տոլարով անհետ կորսուեցաւ՝ ոչ հայ հաւաքածոյ պահողի մը դարաններուն մէջ, փոխանակ դառնալու Անթիլիասի նոր թանգարանի զարդը եւ կամ երթալու եւ եղբայրանալու Երեւանի պետական թանգարանին մէջ, իր ժողովուրդի գրկին մէջ ապրող Սշոյ Առաքելոց վանքի դրան հետ:

Ասոր համար է, որ Արմէն չի կրնար երկինք նայիլ: Մեզմէ շատեր պէտք է նոյնքան ամչնան եւ իրենց աչքերը երկինք չբարձրացնեն:

**ՄԵՍՐՈՊ ԱՐՔ. ԱՇՃԵԱՆ
Նիւ Եորք, ԱՄՆ**

**Հորիզոն, Գրական յաւելում,
ԺԳ. տարի, թիւ 3 (151), մարտ 1997**



ԱՐՄԷՆ ՀԱԽՆԱԶԱՐԵԱՆ 1941 - 2009

Ծնած է Թեհրան, Իրան, 5 մայիս 1941-ին:

1959-ին Արմեն կաւարտէ իր ուսումը հայկական Քուշեշ Դաւիթեան վարժարանին մէջ, Թեհրան:

1969-ին Ճարտարապետութեան դոկտորի տիտղոսը կը ստանայ Ախընի համալսարանէն, Գերմանիա: 1968-ին Արմեն Հախնազարեան կը սկսի իր ուսումնասիրութեան հայ ճարտարապետութեան մասին Արտազի շրջանի Սուրբ Թադէոս վանքի չափագրութեամբ (ներկայիս Մակուի շրջան, Իրան):

1970-ական թուականներուն, Արմեն Հախնազարեան վեց հետախուզական ուղեւորութիւններ կը կատարէ Արեւմտեան Հայաստան, իւրաքանչիւրը մօտաւորապէս երկու ամիս տեւողութեամբ: Հետագային, սակայն, թուրք կառավարութիւնը կ'արգիլէ իր մուտքը Արեւմտեան Հայաստան, որպէս անբաղձալի անհատ (persona non grata):

Հակառակ ատոր, մինչեւ իր անժամանակ մահը ան կը շարունակէ իր ուսումնասիրութիւնները՝ ուրիշ ճարտարապետներ ուղարկելով Արեւմտեան Հայաստան, Փոքր Հայաստան եւ Կիլիկիա:

1973-ին Արմեն Հախնազարեան կ'ամուսնանայ ճարտարապետ Margrit Buenemann-ի հետ եւ կ'ունենան երկու զաւակներ՝ Թալին եւ Շահրիզ:

1974-ին Թեհրանի մէջ կը հիմնէ Monit ճարտարապետական ընկերութիւնը:

1982-ին պաշտօնապէս կը հիմնէ Հայկական ճարտարապետութիւնն ուսումնասիրող հասարակական կազմակերպութիւնը (Research on Armenian Architecture) (RAA):

1983-ին Հախնազարեան կը սկսի դասաւանդել Ախընի համալսարանի Քաղաքաշինութեան բաժինին մէջ, ուր կ'ուսուցանէ երկար տարիներ:

Արմեն Հախնազարեան կը մահանայ 19 փետրուար 2009-ին Ախըն քաղաքին մէջ, Գերմանիա: Իր աճիւնէն մաս մը կը հանգչի Արագածոտն մարզ Արտաշատի գիւղի գերեզմանատան մէջ, Հայաստան:

Յ.Շ.



ՄԱՄՈՒԷԼ ԿԱՐԱՊԵՏԵԱՆ 1961 - 2020

Յուշարձանագետ, պատմաբան, մշակութաբան, բանահաւաք, հայոց լեզուի աննկուն պաշտպան Մամուել Կարապետեան, արմատներով Արճեշ գաւառի Բերդաղ գիւղէն, ծնած է Երեւան, աւարտած է Միսաք Մանուշեանի անուան թիւ 48 դպրոցը: 1975-ին սկսած է ուսումնասիրել Խորհրդային Հայաստանի բնութիւնը, իսկ 1978-էն սկսեալ հետազօտած, լուսանկարած, չափագրած, տեսագրած եւ նկարագրած է հազարաւոր հայկական յուշարձաններ ամբողջ պատմական Հայաստանի տարածքին: Ան գործակիցն էր Արմէն Հախնազարեանի:

Ատրպէյճանի, Թուրքիոյ եւ Վրաստանի կողմէ հայկական յուշարձաններու ոչնչացման փաստերը Մամուել Կարապետեան 2007-ին ներկայացուցած է Միացեալ Նահանգներու գոնկրեսին, իսկ 2008-ին՝ Մարդու իրաւունքներու եւրոպական դատարանին Լահէի մէջ:

Ան նախագահն էր Հայկական ճարտարապետութիւնն ուսումնասիրող հիմնադրամին (Երեւան):

Հեղինակը կամ խմբագիրն է 25 արժեքաւոր գիրքերու եւ բազմաթիւ աշխատութիւններու: Հիմնադիրը, խմբագիրն ու հրատարակիչն էր հայկական ճարտարապետութեան նուիրուած «Վարձք» հանդէսին, որուն առաջին թիւը ձօնած էր Արմէն Հախնազարեանին:

Ան արժանացած է Հայաստանի Հանրապետութեան նախագահի մրցանակին եւ Արցախի Հանրապետութեան «Մեսրոպ Մաշտոց» շքանշանին:

Այցելութիւն Դոան

« Բայց ես ամաչում եմ նայիլ երկնքին»

Մեսրոպ արք. Աշճեան «Որպէս յաւելուած» հրատարակած էր իր գիրը՝ Արամէն Հախնազարեանի «Դուռը» գրութեան հրատարակութեան առիթով, Հորիզոն շաբաթաթերթին մէջ 1997 մարտին:

Սակայն լուսահոգի Մեսրոպ Սրբազանի ճիգերը հոն չէին կանգ առած: Ան իր կապերուն շնորհիւ կրցած էր ստուգել թէ Դուռը վաճառուած էր եւ տեղ գտած Թոմսոն ընտանիքի արուեստի եւ հնութիւններու հաւաքածոյին մէջ՝ Թորոնթօ:

Մեսրոպ Սրբազան 1997 սեպտեմբեր 11-ին նամակ մը ուղարկած էր պ. Տէյվիս Թոմսոնին, որուն իբր պատասխան այս վերջինը հոկտեմբեր 2-ին գրած էր Սրբազանին՝ համաձայնելով որ Դոան այցելութիւն մը կարգադրուի:

Այդ նամակը Մեսրոպ Սրբազան ուղարկած էր ստորագրեալիս, որպէսզի կարենամ կազմակերպել այդ այցելութիւնը:

Նոյն տարուան հոկտեմբեր 23-ին ես ձեռագիր նոթ մը ուղարկեցի պ. Թոմսոնին՝ Արամ Ա. Վեհափառի եւ Մեսրոպ Սրբազանի Թորոնթօ այցելութեան առիթով՝ խնդրելով որ Ժամանակ մը ճշդենք այցելելու եւ Դուռը տեսնելու:

Ժամանակը ճշդուեցաւ Հոկտեմբեր 31-ին:

Այդ օրը Մեսրոպ Սրբազանին հետ այցելեցինք պ. Թոմսոնի բնակարանը՝ Ֆորեստ Հիլ թաղամասին մէջ, Թորոնթօ:

Դրան գոյգ փեղկերը զետեղուած էին պատուանդանի մը վրայ, տան հիւրասենեակէն դէպի պարտէզ ելքին եւ ցուցադրուած՝ որպէս արուեստի գործ:

Մենք յուզումով դիտեցինք Դուռը, քանդակուած պատկերները եւ կարդացինք վրայի փորագրուած գրութիւնները: Ապա Մեսրոպ Սրբազանը բացատրեց տան տիրոջ, որ այս Դուռը շատ կարեւոր եւ պատմական նշանակութիւն ունի մեր եկեղեցւոյ համար, եւ եթէ օր մը պ. Թոմսոն որոշէր բաժնուիլ անկէ, կը խնդրէինք, որ ան մեզի տեղեկացնէ, որպէսզի զայն տեղաւորենք մեր եկեղեցական թանգարաններէն մէկուն մէջ՝ Անթիլիաս կամ Էջմիածին:

Սրբազանը եւ ես նկարուեցանք Դոան քով եւ բաժնուեցանք պ. Թոմսոնէն: Ան խոստացաւ, որ եթէ որոշէ Դոանէն բաժնուիլ, առաջին հերթին Սրբազանին պիտի տեղեկացնէ: Ինչպէս ծանօթ է, 2019-ին Դուռը, Հայ եկեղեցւոյ արուեստի բազմաթիւ այլ գործերու հետ, ցուցադրուեցաւ Նիւ Եորքի Մեթրոփոլիթըն արուեստի թանգարանին մէջ:

Ցուցադրութեան աւարտին՝ Դուռը վերադարձած է Թոմսոնի հաւաքածոյին՝ Թորոնթօ:

Մեր յոյսն ու ջանքն է, որ Թոմսոններէն արտօնութիւն ստանանք Դուռը Թորոնթոյի Հայ կեդրոնին կամ Սուրբ Աստուածածին եկեղեցւոյ մէջ եւս ցուցադրելու, որպէզի մեր ժողովուրդը եւ ընդհանրապէս Թորոնթոյի հանրութիւնը առիթը ունենան վայելելու եւ գնահատելու անոր գեղեցկութիւնը :

**Յարութիւն Շիթիլեան
2020 փետրուար 20**



*Մշոյ Ս. Կարապետ (Բնասկնեան, Գլակալանք) վանքը հարաւ-արեւմուտքէն
1910-ականներուն և վանքի մնացորդները 2006-ին
Լուսանկարները՝ Սամուէլ Կարապետեանի «Եղեոն եղեոնից յերոյ» գիրքէն*

*The monastery seen from the south-west, around 1910 and the remnants in 2006
(Photos by Samvel Karapetian)*